

MAIUS

Die 3 Maii

S. IACOBI APOSTOLI

PRIMI EPISCOPI HIEROSOLYMITANI

Patroni principalis dioecesis patr.

Sollemnitas

Ant. ad introitum

Gaudeamus omnes in Dómino, diem festum celebrantes sub honóre beáti Iacóbi Apóstoli: de cuius sollemnitate gáudent Angeli, et colláudant Fílium Dei (*T.P.* Allelúia).

Collecta

Omnípotens sémpitérne Deus,
qui nos beáti Iacóbi Apóstoli, primi Hierosolymórum Epíscopi,
doctrína illumináre dignátus es,
da nobis, ipso interveniénte,
ut fidem cristiánam verbo et ópere profiténtes,
ad civitátem sanctam, Ierúsalem novam, perveníre mereámur.
Per Dóminum.

LECTIO PRIOR (propr.)

« *Iúdico non inquietari eos qui ex gentibus convertuntur* »

Léctio Actuum Apostolorum

15, 1.6. 13-19

In diébus illis:

Quidam descendentes de Iudaéa docébant fratres: « Nisi

circumcidámini secúndum morem Móysis, non potéstis salvi fieri ». Convenerúntque Apóstoli et presbyteri vidére de verbo hoc.

Et postquam tacuérunt, respóndit Iacóbus dicens :

« Viri fratres, audíte me. Simeon narrávit quemádmódu primum Deus visitávit súmere ex géntibus pópulum Nómini suo, et huic concórdant verba Prophetárum, sicut scriptum est: *Post haec revértar et reaedificábo tabernáculum David quod décidit, et díruta eius reaedificábo et érigam illud ut requírant réliqui hóminum Dóminum, et omnes gentes super quas invocátum est Nómen meum, dicit Dóminus fáciens haec* nota a saéculo. Propter quod ego iúdico non inquietári eos qui ex géntibus convertúntur ad Deum ».

Verbum Dómini.

PSALMUS RESPONSORIUS

Ps 118, 1-2. 4-2. 15-16 (R.32)

R̄. Viam mandatórum tuórum curram (*vel* Allelúia).

- 1 Beáti immaculáti in via
qui ámbulant in lege Dómini.
Beáti qui servant testimónia eius,
in toto corde exquirunt eum. R̄.
- 2 Tu mandásti
mandáta tua custodíri nimis.
Utinam dirigántur viæ meæ
ad custodiéndas iustificatiónes tuas. R̄.
- 3 In mandátis tuis exercébor
et considerábo vias tuas.
In iustificatióne tuis delectábor
non oblivíscar sermónem tuum. R̄.

LECTIO SECUNDA (propr.)

« Ex operibus iustificatur homo »

Lectio Epístolæ beáti Iacóbi Apóstoli

2, 14-24. 26

Quid próderit, fratres mei, si fidem quis dicat se habére, ópera autem non hábeat? Numquid póterit fides salváre eum?

Si frater aut soror nudi sunt et índigent victu cotidiáno, dicat autem áliquis de vobis illis: « Ite in pace, calefacímini et saturámini », non dedéritis autem eis quæ necessária sunt córporis, quid próderit? Sic et fides, si non hábeat ópera, mórtua est in semetípsa.

Sed dicet quis: « Tu fidem habes et ego ópera hábeo. Osténde mihi fidem tuam sine opéribus, et ego tibi osténdam ex opéribus meis fidem ». Tu credis quóniam unus est Deus? Bene facis; et daémones credunt et contremíscunt. Vis autem scire, o homo inánis, quóniam fides sine opéribus otiósa est? Abraham pater noster nonne ex opéribus iustificátus est, ófferens Isaac filium suum super altáre? Vides quóniam fides co-operabátur opéribus illíus et ex opéribus fides consummáta est, et suppléta est Scriptúra dicens: « *Crédidit Abraham Deo, et reputátum est illi ad iustítiam* », et Amícus Dei appellátus est. Vidétis quóniam ex opéribus iustificátur homo et non ex fide tantum...

Sicut enim corpus sine spírítu emórtuum est, ita et fides sine opéribus mórtua est.

Verbum Dómini.

ALLELUIA

R̄. Allelúia V̄. Glória tibi Christe, qui apparuísti Iacóbo.
R̄. Allelúia.

EVANGELIUM

« Qui facit voluntatem Patris, intrabit in caelum ».

✠ Lécio sancti Evangélii secúndum Matthaéum 7, 21. 24-25

In illo témpore :

Dixit Iesus discípulis suis :

« Non omnis qui dicit mihi: Dómine Dómine, intrábit in Regnum caelórum, sed qui facit voluntátem Patris mei qui in caelis est.

Omnis ergo qui audit verba mea hæc et facit ea, assimilábitur viro sapiénti, qui ædificávit domum suam supra petram. Et descéndit plúvia et venérunt flúmina et flavérunt venti et irruérunt in domum illam, et non cécidit; fundáta enim erat supra petram ».

Verbum Dómini.

Super oblata

Réspice, Dómine, múnera
quæ tibi in sollemnitate sancti Iacóbi Apóstoli perhibémus,
et concéde nobis eius intercessióne,
ut in fide stábiles, et in ópere efficáces
semper esse mereámur.
Per Christum.

Praefatio apostolorum

- ℣. Dóminus vobiscum.
℟. Et cum spiritu tuo.
℣. Sursum corda.
℟. Habémus ad Dóminum.
℣. Gratias agámus Dómino Deo nostro
℟. Dignum et iustum est.

Vere dignum et iustum est, æquum et salutáre,
nos tibi semper et ubique grátias ágere :
Dómine, sancte Pater, omnipotens ætérne Deus :
per Christum Dóminum nostrum.

Quóniam Ecclesiám tuam
in apostólicis tribuísti consistere fundaméntis,
ut signum sanctitátis tuæ in terris manéret ipsa perpétuum,
et caeléstia præbéret cunctis homínibus documénta.

Quaprópter nunc et usque in sæculum
cum omni milítia Angelórum
devóta tibi mente concínimus,
clamántes atque dicéntes :

Sanctus . . .

Ant. ad communionem

Mt 7, 21

Non omnis qui dicit mihi: Dómine Dómine, intrábit in Regnum caelórum, sed qui facit voluntátem Patris mei qui in caelis est (T.P. Allelúia).

Post communionem

Reficiat nos, Dómine, panis caeléstis,
quem in sancti Iacóbi sollémnitate suscepimus,
ut et fidei donum íntegrum custodiámus
et bonis opéribus abundémur.
Per Christum.